

पावलसे कोरिन्थला विश्वासीगदेदा भिबा न्हीरेमला चिठी

चु चिठीला बारेरी पाङ्तोःमा

भिबाम्हि: येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे हो लबा मुबा (२ कोरिन्थी १:१)।

भिबा ग्ला: माकेडोनिया भिबा अञ्चलरी भिबा मुबा।

भिबा साल: ओस्पन ईश्वी संवत् ५५-५७ (विक्रम संवत् ११२-११४) साल न्हडरी भिबा मुबा।

खाल्दा भिबा: कोरिन्थ शहररी मुबा विश्वासीगदेदा भिबा मुबा।

पावलसे कोरिन्थला विश्वासीगदेदा डाच्छारेमला चिठी भिसी पुइमाहेन्से ओस्पन तिदिङ लिच्छा भिसी पुइबा चु “न्हीरेमला” चिठी हिन्ना। चु चिठी भिबा धुइरी कोरिन्थला मण्डलीदेन पावलला गुडरी आढिक्बा तामगदे मुबा। मण्डलीला कोइ कोइ म्हिसे पावलदा बिरोध लसी बेइज्जत लबा मुबा। तसैनोन पावलसे थेनीगदेदेन छ्याम ढिक्बारी ल्हानान सेम लजी।

चु चिठीला शुरुरी पावलदेन कोरिन्थला मण्डलीला गुडरी तबा तामगदेला बारेरी भिबा मुला। पावलसे कोरिन्थला मण्डलीरी मुबा हाडदा बेइज्जत लबा कोइ कोइ म्हिगदेदा चिठीरी ल्हानान बड्सी भिबा मुबा। चु चिठीरी भिबा तामसे लमा म्हिगदेसे हाड हाडला पाप ख्लासी परमेश्वरपट्टि दोःबादेन जम्मान तामरी ढिक्बासे लमा पावल ल्हानान ताड्बा मुबा। जमाहेन्से पावलसे यरूशलेमरी मुबा मण्डलीदा सेमहेन्सेन हो लउ भिसी बिन्ती लजी। थेहङ् लसी पावलसे हाड ख्रीष्टला पक्का मुला चेला हिन्ना

भिसी पाङ्बा मुला। तिगदा भिसम कोरिन्थला कोइ कोइ म्हिसे ह्वाङ चा ख्रीष्टला पक्का मुल चेला हिन्ना भिसी पाङ्बा मुबा। ओच्छे पावल चा फट्टा मुल चेला हिन्ना भिसी दोष लबा मुबा।

मुल तामगदे

- फ्याफुल्बादेन धन्यवाद पिन्बा १:१-११
- पावलदेन कोरिन्थरी मुबा विश्वासीगदे १:१२-७:१६
- यरूशलेमरी मुबा परमेश्वरला म्हिगदेला लागिरी भेटी ८:१-६:१५
- पावलसे ह्वाङ ख्रीष्टला मुल चेला हिन्ना भिसी पाङ्बा १०:१-१३:१०
- चिठीला थुमरी भिबा ताम १३:११-१३

पावलसे कोरिन्थला विश्वासीगदेदा भिबा न्हीरेमला चिठी

१ लास्सो, कोरिन्थ शहररी मुबा परमेश्वरला मण्डलीदेन अखैया अञ्चलरी मुबा जम्मान परमेश्वरला म्हिगदेदा परमेश्वरसे ख्रीष्ट येशूला मुल चेला दोबारी धम्बा डा पावलदेन यहाडला आले तिमोथीग्याम फ्याफुल्ला। २यहाडला परमेश्वर आबादेन प्रभु येशू ख्रीष्टग्याम एनीगदेसे दयामायादेन शान्ति याङ्गै।

दुखरी हो लबा परमेश्वर

३यहाडदा ल्हानान दया लबादेन दुखरी हो लबा। ४यहाडला प्रभु येशू ख्रीष्टला आबा परमेश्वरला जयजयकार तगै। ५परमेश्वरसेन यहाडदा जम्मान दुखरी हो लबा मुला। तिग्दा भिसम दुखरी परब तबा स्थहान्दो म्हिगदेदा हो लखम्यै भिसीन थेसे यहाडदा दुखरी हो लबा मुला। ६ख्रीष्टसे नाबा हड्बान दुख यहाडसेनोन ल्हानान नाबासे लमा

परमेश्वरसे यहाडदा ख्रीष्टग्यामसेन ल्हानान हो लबा मुला। ६डन्से दुख नाजी भिसम थे एनीगदेला लागिरी होदेन थार्बा याङ्बाला लागिरी हिन्ना। डन्से दुखरी हो याङ्जी भिसम एनीगदेसेनोन दुखरी हो याङ्ला। ओच्छे डन्से दुख नाखम्बा शक्ति याङ्बा हड् लसी एनीगदेसेनोन दुख नाखम्बा शक्ति याङ्ला। ७एनीगदेशोरी डन्दा पूरान विश्वास मुला। तिग्दा भिसम डन्से नाबा हड्बा दुख एनीगदेसेनोन नाबा मुला, ओच्छे दुखरी डन्से याङ्बा हड्बान हो एनीगदेसेनोन याङ्बा मुला भिसी डन्दा था मुला। ८ज्योज्यो आले नाना आडागदे, डन्से एशिया अञ्चलरी नाबा दुखला बारेरी एनीगदेसेनोन था याङ्गै भिसी डन्से म्हन्बा मुला। थेरी डन्दा नाबारीन आखम्बा दुख तजी, थे दुखसे लमा सोला भिबा डन्दा आशनोन अरेबा। ९डन्से मी सिबान तजी भिसी म्हन्बा

१:३-७ चु पदगदेरी “हो लबा” भिबा चा सम्भब लबा हिन्ना।

मुबा। चु तबा चा हाडसे हाडदान भर लगे भिसी आहिन, तर सिबागदेदा सोना लबा परमेश्वरथोरी भर लगे भिसी चुहड् तजीम।^{१०}थेहड्बा लोड्बा खबा दुखग्याम उन्दा परमेश्वरसेन फेजी, थेसे यहाडदा फेनोन फेला। ओच्छे थेसे यहाडदा सदन फेला भिसी उन्से पूरा विश्वास लबा मुला।^{११}चुला लागिरी एनीगदेसे उन्दा लहानान प्रार्थना लसी पिन्गो। एनीगदेसे उन्ना लागिरी प्रार्थना लबासे लमा परमेश्वरसे उन्दा मोलम पिन्ना, ओच्छे लहानान म्हिगदेसे उन्ना लागिरी परमेश्वरदा धन्यवाद पिन्ना।

पावलसे ग्ला ग्लारी निबारी सेम पोबा

^{१२}चु तामला लागिरी उनी ताड्बा मुला, जम्बुलिडला म्हिगदेला डाच्छा जे आहिन, तर एनीगदेला डाच्छाएनोन उनी परमेश्वरसे उन्बा सत्य^१ ग्यामरी सेमहेन्सेन भ्रबा मुला भिबा ताम उन्से सेमहेन्सेन पाड्खम्ला। चुहड्बा बानीबेहोर चा उन्से म्हिला ज्ञान बुद्धिग्याम याड्बा आहिन, परमेश्वरला दयामायाग्याम याड्बा हिन्ना।^{१३}एनीगदेसे पढब लखम्बादेन घोबारी खम्बा तामगदे जे उन्से एनीगदेदा भ्रिबा मुला। थेतबासेलमा एनीगदेसे पूरान ताम घोखम्ला भिसी डाइ म्हन्बा मुला।^{१४}तसैनोन दान्दे

एनीगदेदा उन्ना बारेरी जजाकर जे था मुला, लिच्छा एनीगदेसे उन्ना बारेरी जम्मान ताम था याड्ला। ओच्छे यहाडला प्रभु येशू फेप्खबा धुइरी एनीगदे उन्ना लागिरी ताड्म्याड्बा हड् लसी उनीएनोन एनीगदेला लागिरी ताड्म्याड्बा।

^{१५-१६}यहाड जम्मान ताड्म्याड्बा भिबा तामरी डा ढुक्क तबा मुला। डा माकेडोनियारी निबा धुइरी एनीगदेदेन छ्याम हुप तबा सेम मुबा, थेहड् लसीन थग्याम दोःसी खमाएनोन एनीगदेदेन छ्याम हुप तबा सेम मुबा। तिग्दा भिसम एनीगदेसे दोब्बर मोलम याड्गै भिबा डाला सेम मुबा। ओच्छे एनीगदेग्याम फेसी डा यहूदिया अञ्चलरी निमा एनीगदेसे डादा ह्यो लला भिसी डाइ म्हन्बा मुबा।^{१७}तर डा एनीगदे मुबा ग्लारी खबारी आखम्नी। तिग डाइ तिगै ताम आम्हन्ना डा एनीगदे मुबा ग्लारी खबारी छ्याइबा भिसी म्हन्बा? तिग डा एनीगदे मुबा ग्लारी खबारी छ्याइमा ख्रीष्टदा डोआसेबा म्हिगदेसे हड् खाइमाम “तला” खाइमाम “आत” भिसी डाइ पाड्बा हिन्ना? आहिन।

^{१८}तर परमेश्वर विश्वास लखम्बा परमेश्वर हिन्ना। थेतबासेलमा डाइएनोन ताम गिकदान खाइमाम “तला” खाइमाम “आत” भिसी खाइमै

१:१२ कोड कोड ग्रीक बाइबलरी “सत्य” भिबादा चोखो भिसी भ्रिबा मुला।

आपाङ्। ^{१६}तिग्दा भिसम परमेश्वरला भ्ना येशू ख्रीष्टला बारेरी सिलास, तिमोथीदेन डाइ एनीगदेदा थेःना लबा ताम चा खाइमाम “हिन्ना” खाइमाम “आहिन” भिबा ताम आहिन्मुबा। तर परमेश्वरला भ्ना येशू ख्रीष्टदेन छ्याम चा सदन “हिन्ना” भिबा ताम जे मुला। ^{२०}तिग्दा भिसम परमेश्वरसे लबा जम्मान हिन्ना भिबा कबुलगदे येशू ख्रीष्टग्यामसेन पूरा तबा मुला। थेतबासेलमा येशू ख्रीष्टग्यामसेन परमेश्वरला मानदेन जयजयकार तगै भिसी य्हाडसे थेला मिन किन्सी, “आमेन” भिमुला। ^{२१}डन्देन एनीगदेदा ख्रीष्टदेन छ्याम गिक स्होसी भड्बा स्होबादेन य्हाडदा धम्बा चा परमेश्वरसेन हिन्ना। ^{२२}थेहड् लसी डालान हिन्ना भिसी परमेश्वरसे य्हाडदा छापएनोन लबा मुला। ओच्छे थेसे य्हाडदा जम्मान स्हे पिन्ना। तर य्हाडसे जम्मान स्हे आयाड्देधोनाला लागिरी थेसे ह्हाडला आत्मा बैनाला रूपरी य्हाडला सेमरी थान्सी पिन्बा मुला।

^{२३}डा कोरिन्थ शहररी आखबा चा डाइ एनीगदेदा बड्सी एनीगदेला सेम स्हु थाखगै भिसी हिन्ना। चु ताम परमेश्वरदान था मुला। ^{२४}एनीगदेसे विश्वास लबा तामथोरी डन्से खाइमै अधिकार आल। तर एनीगदे ताङ्गै भिसी एनीगदेदेन छ्याम ढिक्सी गे लला। तिग्दा भिसम एनीगदे विश्वासरी कोङ्बा मुला।

२ थेतबासेलमा एनीगदेदा सुर्दा थातगै भिसी डा एनीगदे मुबा ग्लारी आखबा पक्का लजी। ^२डादा ताङ्ना लबा चा एनीगदेन हिन्ना। थेतबासेलमा डाइ एनीगदेला सेम स्हु खना लजी भिसम डादा खाल्से ताङ्ना लबा? ^३थेतबासेलमा डा खमा ताङ्ना लबा म्हिगदेग्याम डादा सुर्दा थातगै भिसीन डाइ थे चिठी भिबा हिन्ना। तिग्दा भिसम डा ताङ्बा धुइरी एनीगदेएनोन ताङ्ला भिबा डादा पक्का विश्वास मुला। ^४डादा सेमरी सुर्दा तबा मुबा ओच्छे सेम ल्हानान स्हु खसी क्राबान थे चिठी भिबा मुबा। डाइ थे चिठी एनीगदेदा दुख तना लबारी भिबा आहिन, तर डाइ एनीगदेदा गाते माया लबा मुला भिबा ताम एनीगदेसे था याङ्गै भिसी भिबा मुबा।

गलती लबागदेदा माफ लबा

^५खालै म्हिसे दुख पिन्बा मुसम थेसे एनीगदे जम्मादान भन्दा डादा ल्हाना दुख पिन्बा हिन्ना। पाङ्गोन तोःमा थे ताम जस्तोन मुसैनोन दाहेन्से डादा थे भन्दा ल्हाना पाङ्बा सेम आरे। ^६थेहड्बा म्हिदा एनीगदे न्हडला ल्हानान म्हिगदे ढिक्सी पिन्बा सजायसे छ्योबा मुला। ^७थेतबासेलमा दाहेन्से एनीगदेसे थेदा माफ लतोःला, ओच्छे थेदा हो लतोःला। आहिन्सम सेमरी ल्हानान दुख तसी थेदा भन सुर्दा तला। ^८थेतबासेलमा एनीगदेसे

थे म्हिदा अझ सेमहेन्सेन माया लउ भिबा डाला बिन्ती मुला।

६ एनीगदेसे डाइ कुल्बा जम्मान ताम ड्यान्बा चीम कि आड्यान्बा चीम भिसी च्याबाला लागिरीन डाइ एनीगदेदा थे चिठी भिबा मुबा। १० एनीगदेसे जुन म्हिदा माफ लबा मुला डाइएनोन थेदा माफ लला। चुदे डाइ तिगै तामरी खालैदा माफ लबा मुसम एनीगदेलान लागिरी डाइ ख्रीष्टला डाच्छापट्टि थेदा माफ लबा मुला। ११ शैतानसे यहाडदा फसब लआम्याड्गै भिसीन डाइ थेहड् लबा हिन्ना। तिगदा भिसम शैतानना जम्मान जुक्तिगदे यहाडदा था मुला।

प्रभुला गे लबागदे

१२ डा त्रोआस भिबा शहररी ख्रीष्टला थार्बा पिन्बा समाचार थेःना लबारी खमा प्रभुसे डादा थेला गे लबा मौका पिन्जी। १३ तर डाइ थेरी यहाडला आले तीतसदा आस्याप्मा डाला सेमरी शान्ति आरेबा। थेतबासेलमा डा थेनीगदेग्याम फेसी माकेडोनिया भिबा अञ्चलरीक्यार निजी।

१४ तर परमेश्वरदा धन्यवाद तगै, तिगदा भिसम थेसे यहाडदा सदन ख्रीष्टदेन छ्याम ढाबा ग्यामरी थोला। ओच्छे डनीग्यामसेन थेसे ज्यबा बास्ना खबा हड्बा ख्रीष्टला ज्ञान बुद्धिला तामगदे जम्मान ग्लारी धोना

लला। १५ तिगदा भिसम थार्बा याड्बा म्हिगदेदेन नाश तसी निबा म्हिगदेला गुडरीनोन डनी परमेश्वरला लागिरी ख्रीष्टग्याम ज्यबा बास्ना खबा धूप हिन्ना। १६ नाश तसी निबा म्हिगदेला लागिरी चा यहाड कालला थाड हिन्ना, ओच्छे थार्बा याड्बा म्हिगदेला लागिरी चा सोना लबा बास्ना हिन्ना। चुहड्बा गे लखम्बा म्हि खाल मुला? १७ तिगदा भिसम डन्से स्थहान्दो म्हिगदेसे हड् लसी परमेश्वरला बचन व्यापार लबा आरे। तर डन्दा परमेश्वरसेन पुइखबा हिन्ना। थेतबासेलमा परमेश्वरला ओन्छाडरी ख्रीष्टदेन छ्याम गिक तसी डन्से ज्यबा सेमसे पाड्ला।

३ तिग दोःसी डन्से हाडसे हाडदान घेन स्होबारी म्हाडबा हिन्ना? आहिन। तिग स्थहान्दो म्हिगदेसे हड् लसी डादा मान लउ भिसी एनीगदेदा स्थहान्दो म्हिसे चिठी भितोःला? भिआतोः। थेहड् लसीन एनीगदेसेनोन डादा मान लउ भिसी स्थहान्दो म्हिदा चिठी भिआतोः। २ जम्मान म्हिगदेसे घोबादेन पढब लखम्बा डन्ना सेमरी भिबा चिठी एनीगदेन हिन्ना। ३ एनीगदे ख्रीष्टसे भिबा चिठी हिन्ना, ओच्छे चिठी सबा चा डनी हिन्ना। चु चिठी मसीसे भिबा आहिन, तर छोन्बो परमेश्वरला आत्मासे भिबा हिन्ना। ओच्छे चु युडबाला पाटीरी[†] भिबा चिठी

३:३ परमेश्वरसे इस्राएलीगदेदा पिन्बा गोर च्युइ कुल्बा तामगदे युडबाला पाटीरी भिबा मुबा।

आहिन, तर यहाडला सेमला पाटीरी भिबा हिन्ना।*

४ परमेश्वरला ओन्छाडरी डनी ख्रीष्टग्याम दुक्क तबा मुला।
 ५ खजिबै ताम डनी हाडसेन लबारी खम्ला भिसी आपाड्, तर जम्मान ताम परमेश्वरग्याम लबारी खम्ला।
 ६ परमेश्वरसे छार कबुल लबा मुला ओच्छे डन्दा थे कबुल अन्छार गे लखम्बा म्हि स्होबा मुला। चु कबुल परमेश्वरला आत्मासे लबा कबुल हिन्ना, भिबा ठिमसे लबा कबुल आहिन। भिबा ठिमसे सिना लमुला, तर परमेश्वरला आत्मासे सोना लमुला।

छार कबुलग्याम खबा यहाल

७ ठिम युडबाला पाटीरी ट्वाइसी भिसी पिन्बा धुइरी परमेश्वरला यहालदेन शक्ति खजी। थे यहाल मोशाला लीरी परब तजी, लिच्छा थे यहाल म्हाबान निजी। तसैनोन थे यहालसे लमा इस्राएलीगदेसे मोशाला लीरी च्याबारी आखम्नी। सिना लबा ठिम याड्बा धुइरी मी थेहड्बा यहाल तजी भिसम ८ परमेश्वरला आत्मासे लबा गेग्याम भन गाते यहाल यहाल तला। ९ तिग्दा भिसम म्हिला दोष उन्बा गे मी थेहड्बा यहाल तजी भिसम परमेश्वरदा सेम निबा म्हि स्होबा गे भन ल्हानान यहाल तला।

१० पाड्नुोन तोःमा छार ग्यामला यहाल चा थे डाच्छाला यहाल भन्दा भन उदेकला यहाल मुबासे लमा थे डाच्छाला यहाल म्हासी निजी।
 ११ छिन्नडला लागिरी खबा स्हे मी यहालरी खजी भिसम सदनना लागिरी खबा स्हे मी भन ल्हानान यहाल यहाल तला।

१२ डन्से थेहड्बा आश लबासे लमान डन्से ल्हानान आँट याड्बा मुला। १३ यहाड मी मोशा हड्बा आहिन, थेसे थे म्हासी निबा यहाल इस्राएलीगदेसे थाम्राड्गै भिसी हाडला ली घप्मुबा। १४ तर थेनीगदेला सेम कोड्बा मुबा, तिग्दा भिसम दान्देधोनाएनोन थेनीगदेसे थे डाच्छाला कबुल पढब लबा धुइरी हाडला सेम घप्मुला। थेतबासेलमा थेनीगदेसे सत्य ताम घोबारी आखम। थे घप्बा स्हे चा ख्रीष्टसे जे तेःखम्ला। १५ दान्देधोनाएनोन मोशाला ठिम पढब लबा धुइरी थे घप्बा स्हेसे हाडला सेम घप्बासे लमा थेनीगदेसे आघोमुला।

१६ तर म्हि प्रभुपट्टि दोःमैछ्याम थे घप्बा स्हे थेग्याम तेःला। १७ तिग्दा भिसम प्रभु आत्मा हिन्ना। थेतबासेलमा जुन म्हिदेन छ्याम प्रभुला आत्मा मुला थे म्हि खालैला तहरी आत। १८ यहाड जम्मासेन ली आघप्ना प्रभुला यहालदेन शक्ति उन्बा

मुला। प्रभु आत्मा हिन्ना, ओच्छे थेंग्याम खबा थेनोन य्हालसे य्हाडदा थे ह्ङ्बान स्होबान भन ल्हानान य्हालरी भोर्बान मुला।

साप्राला ताडरी मुबा सम्पत्ति

४ परमेश्वरसे हाडसेन दया लसी डन्दा चु गे पिन्बासे लमा डन्से सुर्दा लआतोः।^२डन्से लतोःबा जम्मान पेःबा खबा गेगदे ख्लासी जिन्बा मुला। ओच्छे स्थान्दोदा जाल लसी फसब लबा ताम लबा आरे। थेह्ङ् लसीन परमेश्वरला बचन लोप्बा धुइरी बचनरी मुबा तिगै ताम पोबा आरे। बरु डन्से परमेश्वरला सत्य बचन म्हिगदेदा घोना लबान डनी खाल हिन्ना भिसी म्हिगदेदा उन्बा मुला। ओच्छे थेनीगदेसे परमेश्वरला डाच्छा डनी खाह्ङ्बा म्हि हिन्ना भिसी था याङ्गला।^३चुदे डन्से थेःना लबा थार्बा पिन्बा समाचार घप्बा मुसम थे नाश तसी निबा म्हिगदेला लागिरी जे घप्बा मुला।^४चु जम्बुलिडरी शासन लबा ल लुसे विश्वास आलबा म्हिगदेला सेम घप्सी पिन्बा मुला। थेतबासेलमा ख्रीष्टला घेन मानना बारैरी उन्बा थार्बा पिन्बा समाचारला य्हालदेन शक्ति थेनीगदेसे म्हाङ्बा आरे। ख्रीष्टनोन परमेश्वरला रुप हिन्ना।^५डन्से हाडलान बारैरी थेःना लबा आहिन, तर येशू ख्रीष्टनोन प्रभु हिन्ना

भिसी थेःना लबा मुला। ओच्छे येशूला लागिरी डनी एनीगदेला नोकर हिन्ना भिसी थेःना लबा मुला।^६“धोपधोपरी य्हाल तउ” भिसी सुङ्बा परमेश्वरसे येशू ख्रीष्टला स्थालग्याम तबा य्हाल परमेश्वरला घेन मानना ज्ञान बुद्धिदा घोबारी खम्मौ भिसी डन्ना सेमरी थेसे य्हाल तना लजी।*

^७दाहेन्से डन्ना सेमरी चु य्हाल मुला, तर डनी हाडनोन चा साप्राला ताड ह्ङ्बा हिन्ना। थेतबासेलमा डन्देन छ्याम मुबा चु शक्ति डनी हाडलान आहिन, तर परमेश्वरग्यामनोन खबा हिन्ना भिबा ताम प्रस्टन था तला।^८डन्से सदन ह्ङ्बा दुख याङ्बा मुला, तसैनोन डन्ना सेम सिबा आरे। ओच्छे डनी तिग लबा भिसी अलमल तबा मुला, तसैनोन डन्ना सोबा आश म्हाबा आरे।^९डन्से ल्हानान दुख याङ्बा मुला, तसैनोन परमेश्वरसे डन्दा ख्लाबा आरे। डन्दा म्हिगदेसे ल्हानान तोबा मुला, तसैनोन डनी नाश तसी निबा आरे।^{१०}डन्ना चु ल्हुङ्ग्याम येशूला ह्ङ्बा जुनी म्हाङ्खम्मौ भिसी थेसे सिबा धुइरी नाबा ह्ङ्बान दुख डन्सेनोन सदन नाबा मुला।^{११}तिग्दा भिसम दान्दे डनी सोतेधोना डन्ना ल्हुङ्ग्याम येशूला जुनी म्हाङ्गै भिसी डनी सदन येशूला लागिरी सिबारीनोन तयार मुला।^{१२}थेह्ङ् लसीन डनी सितोःसैनोन डन्से एनीगदेला गुडरी

ख्रीष्टला गे लबान मुला, तर चुग्याम एनीगदे सोबा मुला।

१३ “डाइ विश्वास लबासे लमा डाइ पाइबा मुला” भिसी बचनरी भिबा म्हिदेन छ्याम विश्वास लबा आत्मा मुबा हड्दोनो डन्देन छ्यामएनोन विश्वास लबा आत्मा मुला। थेतबासेलमा डन्से विश्वास लला ओच्छे पाइला।* १४ डन्दा था मुला, प्रभु येशूदा सिबाग्याम सोना लबा परमेश्वरसे डन्दाएनोन येशूदेन छ्यामनोन सोना लला, ओच्छे परमेश्वरसेन डन्दा एनीगदेदेन छ्याम हाड मुबा ग्लारी भोर्ला। १५ चु जम्मान ताम एनीगदेला लागिरीन तबा हिन्ना। तिग्दा भिसम जति ल्हानान म्हिगदेसे परमेश्वरला दयामाया याइला ओतेन म्हिगदेसे परमेश्वरला मानदेन जयजयकार लबाला लागिरी परमेश्वरदा धन्यवाद पिन्बा गे बढब तबान निखम्मौ।

छार जुनी

१६ थेतबासेलमा डन्दा तिगै सुर्दा आरे। डन्ना चु लहुइ कमजोर तसी निसैनोन डन्ना आत्मा चा धिन धिननोन छार दोबान निला। १७ डन्से दान्दे तिगै धिनना लागिरी नाबा जजाबा दुखग्यामसेन डन्ना लागिरी जुकजुकधोना चिबा यहालदेन शक्ति याइला। चु दुखगदे भन्दा चु

यहालदेन शक्ति चा ल्हानान घेन मुला। १८ डन्से म्राइबा स्हेगदेदा आहिन, तर आम्राइबा स्हेगदेदा च्याबा मुला। तिग्दा भिसम म्राइबा स्हेगदे मी छिन्नडला लागिरी जे तला, तर आम्राइबा स्हेगदे मी जुकजुकधोना चिला।

५ तिग्दा भिसम यहाडला चु स्या काला लहुइ फुप्सी निबा दिम हड्बान मुला। तसैनोन परमेश्वरसे यहाडदा स्वर्गरी जुकजुकधोना चिबा लहुइ पिन्ना। चु लहुइ चा म्हिला यासे स्होबा फुप्सी निबा दिम हड्बा आहिन, तर परमेश्वरसे स्होबा हिन्ना भिबा ताम यहाडदा था मुला। २ भिनोन तोःमा चुरी यहाड लहुइरी ल्हानान ब्लप्सी चिबा मुला। ओच्छे परमेश्वरसे पिन्बा लहुइ किन्बारी यहाडसे ल्हानान सेम लबा मुला। ३ तिग्दा भिसम थे लहुइ किन्माहेन्से स्वर्गरी यहाडला आत्मा थे लहुइदेन छ्यामनोन तला। ४ यहाडदा चु जम्बुलिडरी सोतेधोना दुख मी तनोन तला। चु भिबा चा यहाड सिबारीदेन यहाडदेन छ्याम मुबा चु लहुइ ख्लाबारी म्हाइबा चा आहिन। बरु यहाडला चु सिबा लहुइ पोबाला लागिरी यहाडसे सदन सोबा छार लहुइ किन्बारी म्हाइबा हिन्ना। ५ दाहेन्से चुनोन छार लहुइला लागिरी यहाडदा परमेश्वरसे स्होबा हिन्ना।

ओच्छे यहाडदा थेसे हाडला आत्मा
बैना पिन्सी पक्का लबा मुला।

६ डनी चु सिसी निबा ल्हुइरी
मुतेधोना प्रभुग्याम थारेड मुसैनोन
छार ल्हुइ याडला भिबा तामरी सदन
हुक्क मुला। ७ थेतबासेलमा डनी
विश्वासग्याम भ्रबा मुला, डन्ना मीसे
म्राड्बा ताम अन्छार आहिन। ८ चु
सिसी निबा ल्हुइरी चिबा भन्दा मी
परमेश्वरला दिमरी प्रभुदेन छ्यामनोन
चिला भिबा तामरी डनी पूरान हुक्क
मुला। ९ थेतबासेलमा डनी चुरी
मुसैनोन, प्रभुदेन छ्याम मुसैनोन
डन्ना सेम चा प्रभुदा ताडना लबा जे
हिन्ना। १० तिग्दा भिसम निसाफ लबा
धुइरी यहाड जम्मान ख्रीष्टला डाच्छा
राप्तोःला। थे धुइरी यहाडसे ल्हुइरी
मुबा धुइरी ज्यबा आज्यबा खाहड्बा
गे लबा मुला, थे अन्छार यहाडदा
ख्रीष्टसे निसाफ लला।

ख्रीष्टग्याम परमेश्वरदेन छ्याम ढिक्वा

११ परमेश्वरदेन छ्याम लोड्बा
भिबा तिग हिन्ना, थे ताम था
याड्सी डन्से स्थहान्दोगदेदाएनोन
थे अन्छार भ्रपुड्मुला। परमेश्वरसे
डन्दा ज्यना लसी डोसेबा मुला।
ओच्छे डनी खाहड्बा मुला भिबा
ताम एनीगदेसेनोन था याड्सी
जिन्बा मुला भिसी डाइ म्हन्बा
मुला। १२ एनीगदेसे डन्दा मान लगै
भिसी डन्से दोःसी चु ताम पाड्बा

आहिन। तर सेमला तामदा वास्ता
आलना मीसे म्राड्बा तामरी घमण्ड
लबा म्हिगदेदा एनीगदेसे ज्यना लसी
जोहाब पिन्खम्मौ, ओच्छे डन्ना बारेरी
था याड्सी एनीगदे ताड्खम्मौ भिसी
पाड्बा हिन्ना। १३ चुदे डन्ना सेम
ग्लारी आरे भिसम थे परमेश्वरला
लागिरी हिन्ना, ओच्छे चुदे डन्ना
सेम ग्लारी मुला भिसम थे एनीगदेला
लागिरी हिन्ना। १४ डनी ख्रीष्टला
मायाला तहरी मुला, तिग्दा भिसम
यहाड जम्मान लागिरी ख्रीष्ट सिबा
मुला। थेतबासेलमा जम्मान म्हि सिबा
मुला भिबा ताम डन्दा पक्का विश्वास
मुला। १५ ख्रीष्ट जम्मान म्हिला
लागिरी सिजी। थेतबासेलमा दाहेन्से
सोबागदे हाडला लागिरी आहिन, तर
थेनीगदेला लागिरी सिबाग्याम सोबा
ख्रीष्टला लागिरी सोतोःला।

१६ दाहेन्से डन्से खालैदान
जम्बुलिडला म्हिगदेसे म्हन्बा हड्
लसी म्हन्बारी आत। डाच्छा मी
डन्सेनोन ख्रीष्टदा थे म्हिगदेसे
म्हन्बा हड् लसीन म्हन्बा मुबा।
तर दाहेन्से डन्से ख्रीष्टदा थेहड्
लसी आम्हन। १७ थेतबासेलमा चुदे
खालै म्हि ख्रीष्टदेन छ्याम गिक
तसी जिन्बा मुला भिसम थे छार
दोसी जिन्बा मुला, पुरानो तामगदे
जम्मान म्हासी जिन्बा मुला। च्यागो,
थे जम्मान ताम छार दोसी जिन्बा
मुला। १८ चु जम्मान ताम चा यहाडदा
ख्रीष्टग्याम हाडदेन छ्याम ढिक्वा

लबा परमेश्वरग्याम तबा हिन्ना। ओच्छे परमेश्वरसे हाडदेन छ्याम स्थहान्दोदा ढिकना लबा गे डन्दा पिन्बा मुला। १६थेनोन परमेश्वर हाडनोन ख्रीष्टदेन छ्याम तसी जम्बुलिडला जम्मान म्हिगदेदा हाडदेन छ्याम ढिकना लबान मुबा। थेतबासेलमा परमेश्वरसे थेनीगदेसे लबा पापला त्तगै सय आकिन्नी। ओच्छे स्थहान्दो म्हिगदेदा परमेश्वरदेन छ्याम ढिकना लबा गे डन्दा जिम्मा पिन्बा मुला। २०थेतबासेलमा डनी ख्रीष्टला समाचार भोर्बा म्हि हिन्ना। परमेश्वर हाडनोन डन्देन छ्याम तसी एनीगदेदा ड्योइबान मुला। डनीएनोन ख्रीष्टदेन छ्याम तसी एनीगदे परमेश्वरदेन छ्याम ढिकगो भिसी बिन्ती लला। २१यहाड ख्रीष्टग्याम परमेश्वरदा सेम निबा म्हि दोगै भिसी पापनोन आलबा ख्रीष्टदा परमेश्वरसे यहाडला जम्मान पाप काप्सी पिन्जी।

६ डनी परमेश्वरदेन छ्यामनोन गे लबा म्हि तबासे लमा एनीगदेदा परमेश्वरसे पिन्बा दयामाया खेरो निना थालउ भिबा डन्ना बिन्ती मुला। २तिगदा भिसम परमेश्वरसे चुहड् भिसी सुड्बा मुला,

“ठीक धुइरी डाइ एसे लबा बिन्ती थे:बा मुला,
ओच्छे थार्ना लतो:बा धिनरी डाइ सदन ह्यो लजी।”

च्यागो, ठीक धुइदेन थार्ना लबा धिन चा दान्देन हिन्ना।*

पावलला दुख

३डन्से लबा गेदा खालैसेन बिरोध थालगै भिसी डन्से खालैदान दुख पिन्बा गे आल। ४तर डन्से जम्मान तामग्याम डनी परमेश्वरला गे लबा म्हि हिन्ना भिसी उन्ना। डन्से जम्मान दुख, गाह्यो तबा ताम, आपत विपतला ताम सोजो तसी नाबा मुला। ५डन्दा तोबा ग्याड्बा लजी, भयाल्खानरी भाड्जी, बिरोध लसी म्हिगदेसे हुल दडगा लजी, दुख लसी गे लजी, म्हेर्बारी आम्याड्नी ओच्छे चआम्याड्नी। ६डन्से ज्यबा बानीबेहोर, ज्ञान बुद्धि, दुख नाखम्बा शक्ति, दया, परमेश्वरला आत्मादेन सत्य माया थोसी भ्रबा मुला। ७डन्से सत्य बचनग्याम ओच्छे परमेश्वरलान शक्तिग्याम थेला गे लबा म्हि हिन्ना भिसी उन्बा मुला। नइबा तामगदेथोरी ढाबारीदेन जम्मान तामग्याम जोगब तबाला लागिरी थोबा हतियारगदे चा परमेश्वरदा सेम निबा बानीबेहोर हिन्ना। ८खालैसे डन्दा मान लजी, खालैसे डन्दा बेइज्जत लजी। खालैसे डन्दा ज्यबा म्हि भिसी पाड्जी, खालैसे डन्दा बिरोध लजी। ओच्छे खालैसे डन्दा लुसीला ताम पाड्बा म्हि हिन्ना भिसी पाड्जी। तर डन्से सत्य ताम पाड्बा मुला।

६३ उन्दा डोआसेबा म्हिदा हड् लसैनोन उन्दा जम्मासेन डोसेबा मुला। सिबा हड्बान तसैनोन डनी सोबान मुला, ओच्छे तोबा ग्याड्बा लजी तर उन्दा साइबा आरे। १० उन्ना सेमरी ल्हानान दुख मुला, तसैनोन डनी सदन ताड्बा मुला। डनी प्राडबो मुसैनोन उन्से ल्हानान म्हिगदेदा विश्वासरी फ्युकपो स्होला। ओच्छे तिगै आरेसैनोन उन्देन छ्याम जम्मान स्हे मुला।

११ कोरिन्थला डाला ह्योगदे, उन्से एनीगदेदा जम्मान ताम घोना लसी पाड्बा मुला, एनीगदेदा उन्ना सेमहेन्सेन ल्हानान माया लबा मुला। १२ उन्से एनीगदेदा माया लबा रूलाबा आरे, बरु एनीगदेसे चा उन्दा ल्हाना माया आलमुला। १३ थेतबासेलमा डाइ एनीगदेदा डालान कोलागदेदा हड् लसी पाड्बा, एनीगदेसेनोन उन्दा सेमहेन्सेन ल्हानान माया लउ।

ख्रीष्टदा विश्वास लबागदेदेन आलबागदे

१४ म्हे मोइबा धुइरी जुवा गिकरीन म्हेदेन ता नारब आलबा हड् लसी एनीगदेएनोन ख्रीष्टदा विश्वास आलबा म्हिगदेदेन छ्याम गिक तसी थाभ्रउ। तिगदा भिसम ज्यबादेन पाप खाइमै ठिक्बारी आखम ओच्छे

धोपदेन यहाल खाइमै ग्ला गिकरी आत। १५ ख्रीष्टदेन शैतान† खाइमै गिक आत ओच्छे ख्रीष्टदा विश्वास लबागदेदेन विश्वास आलबागदेएनोन खाइमै गिक आत। १६ मूर्तिगदेदेन परमेश्वरला मन्दिर खाइमै गिक आत। तिगदा भिसम यहाड चा छोन्बो परमेश्वरला मन्दिर हिन्ना। परमेश्वरसेनोन चुहड् भिसी सुड्बा मुला,

“डादा तेन्बा म्हिगदेदेन छ्याम चिला,
ओच्छे थेनीगदेदेन छ्यामनोन भ्रला।

डा थेनीगदेदान परमेश्वर दोला,
ओच्छे थेनीगदे चा डाला म्हि दोला।* ”

१७ थेतबासेलमा एनीगदे थेनीगदेग्याम फेसी खउ,
ओच्छे फेसी चिउ।
नइबा स्हेगदे तिगैनोन थाथुर्गो,
डाइ एनीगदेदा डालान म्हि स्होला’ भिसी परमप्रभुसे सुड्बा मुला।”*

१८ “डा एनीगदेला आबा दोला,
ओच्छे एनीगदे चा डाला भा भामे दोला’ भिसी जम्मान भन्दा घेन परमप्रभुसे सुड्बा मुला।”*

६:१५ ग्रीक बाइबलरी शैतानदा बेलिआल भिसी भ्रिबा मुला। खाइमा गिक न्ही यहूदीगदेसे शैतानदा बेलिआल भिसी पाड्मुबा। बेलिआल भिबा चा गे आखेल्बा हिन्ना।

६:१६ लेवी २६:१२; इजि ३७:२७ ६:१७ यशै ५२:११ ६:१८ २ शमू ७:१४

७ थेतबासेलमा डाला सेम निबा ह्योगदे, परमेश्वरसे यहाडदेन छ्याम थें कबुलगदे लबासे लमा यहाडसे यहाडला लहुइदेन आत्मादा आज्यबा तना लबा जम्मान नइबा स्हेगदेदा भ्याङ्सी चोखो म्हि दोगे। ओच्छे परमेश्वरदा मान लसी तिगै दोष आरेबा म्हि दोसी भ्रइ।

पावल ताङ्बा

२ एनीगदेसे डन्दा सेमहेन्सेन ल्हानान माया लउ। डन्से खालैदान आज्यबा व्यवहार लबा आरे। ओच्छे डन्से खालैला विश्वास न्होङ्ना लबादेन खालै म्हिग्याम फाइदा किन्बाएनोन आरे। ३ चु ताम डाइ एनीगदेदा दोष लबारी पाङ्बा आहिन। तिग्दा भिसम एनीगदे डन्ना सेमरी मुला भिबा ताम डाइ एनीगदेदा डाच्छान पाङ्सी जिन्बा मुला। डनी एनीगदेदेन छ्यामनोन सितोःसै सोतोःसै तयार मुला। ४ डा एनीगदेदेन छ्याम दुक्क मुला। एनीगदेदा डोसेबासे लमा डा ल्हानान ताङ्बा मुला, एनीगदेसे डादा ल्हानान तामरी आँट पिन्बा मुला। थेतबासेलमा डन्से नातोःबा जम्मान दुखरीनोन डा ल्हानान ताङ्बा मुला।

५ तिग्दा भिसम माकेडोनियारी खसीनोन डन्से बलपबा न्हआम्याङ्नी। डन्दा भन जम्मानग्याम आपत विपत तजी। डन्दा ल्हानान म्हिसे

बिरोध लसी बङ्जी ओच्छे सेमरी ल्हानान लोङ्बा खजी।* ६ तर तीतस डनी मुबा ग्लारी खबा तामग्याम दुख तबागदे जम्मादान आँट पिन्बा परमेश्वरसे डन्दा आँट पिन्जी। ७ थे खबासे लमा जे आहिन, तर एनीगदेसे थेदा पिन्बा आँटग्याम डन्से आँट याङ्बा मुला। एनीगदेसे डादेन छ्याम हुप तबारी ल्हानान सेम लबा मुला भिसी थेसे डन्दा पाङ्जी। ओच्छे डाच्छा डाला सेम स्हु खना लबा ताम ढन्सी एनीगदेसे ल्हानान दुख ड्हम्बा मुला भिबादेन डादा ल्हानान वास्ता लबा मुला भिबा तामएनोन थेसे डन्दा पाङ्जी। चु ताम थेंःसी डा भन ल्हानान ताङ्बा मुला।

८ डाइ भिबा चिठीग्याम एनीगदेदा सुर्दा तजी भिसी डाइ दुख म्हन्बा आरे, हिन्बाम डाच्छा डादाएनोन सुर्दा तबा मुबा। थें चिठीसे एनीगदेदा छिन्नडला लागिरी जे तसैनोन सुर्दा तना लजी भिबा ताम डाइ था याङ्जी। ९ एनीगदेदा सुर्दा तजी भिसी डा ताङ्बा आहिन, तर थें सुर्दाग्याम एनीगदेसे ह्याडसे लबा आज्यबा गेगदे ख्लासी परमेश्वरपट्टि दोःजी भिसी ताङ्बा हिन्ना। तिग्दा भिसम डनीग्याम एनीगदेदा तिगै सुर्दा थातगै भिसी एनीगदेसे परमेश्वरसे म्हन्बा अन्छारला दुख नाजी। १० तिग्दा भिसम परमेश्वरदा ढन्सी लबा

सुर्दा चा परमेश्वरदा सेम निबा सुर्दा हिन्ना। चुनोन सुर्दासे थाबा याड्बाला लागिरी म्हिदा हाडला पाप रूलासी परमेश्वरपट्टि दोःपुड्ला। ओच्छे थे तामसे सेमरी तिगै दुख आत। तर जम्बुलिडला सुर्दासे चा म्हिदा सिना लला। ११तिगदा भिसम च्यागो, परमेश्वरग्याम खबा सुर्दासे एनीगदेदा गाते आँट पिन्बा मुला। थे सुर्दासे एनीगदेदा हाड तिगै दोष आरेबादेन ज्यबा म्हि हिन्ना भिसी उन्बारी आँट पिन्बा मुला। थे सुर्दासे एनीगदेला गुडरी पाप लबा म्हिगदे प्राड्सी बोमो खना लबा मुला। ओच्छे एनीगदेदा डादेन छ्याम हुप तबा सेम पिन्ना। थेहड् लसीन पापग्याम याड्बा सजाय प्राड्सी लोड्बादेन पाप गे लबा म्हिदा सजाय पिन्बा सेम खना लला। चु तामग्यामसेन एनीगदे तिगै दोष आरेबा म्हि हिन्ना भिसी था याड्ला। १२डाइ थे चिठी दुख पिन्बा अथवा दुख याड्बा म्हिला लागिरी भिबा आहिन। तर परमेश्वरला डाच्छा एनीगदेसे इन्दा गाते ढन्बा मुला भिबा ताम था याड्बाला लागिरीन डाइ भिबा हिन्ना। १३थेतबासेलमा इन्से आँट याड्बा मुला।

इन्से आँट जे आहिन, एनीगदेसे तीतसदा ताड्ना लबासे लमा इनीएनोन ल्हानान ताड्बा मुला। १४तिगदा भिसम डाइ एनीगदेला बारेरी तीतसदेन छ्याम घमण्ड लसी ताम लमुबा, तसैनोन डा पेःआतोःनी।

इन्से एनीगदेदा सत्य ताम पाड्बा हड् लसीन तीतसदेन छ्याम घमण्ड लसी पाड्माएनोन सत्य दोजी। १५एनीगदे लोड्सी तीतससे पाड्बा जम्मान ताम इयान्सी थेदा मान लजी। थे ताम ढन्सी थेसे एनीगदेदा भन ल्हानान माया लबा मुला। १६एनीगदेथोरी पूरान भर लखम्बासे लमा डा एनीगदेदेन छ्याम ल्हानान ताड्बा मुला।

ज्यबा सेमसे पिनतोःबा

ज्योज्यो आले नाना आडागदे, माकेडोनिया अञ्चलरी मुबा मण्डलीगदेदा परमेश्वरसे लबा दयामायाला बारेरी इन्से एनीगदेदा पाड्बा सेम मुला। २स्थहान्दोसे ल्हानान दुख पिन्बा धुइरीनोन थेनीगदे ल्हानान ताड्बा मुबा। ओच्छे ल्हानान प्राडबो तसैनोन थेनीगदेसे स्थहान्दोदा ज्यबा सेमसे दान पिन्मुबा। ३थेनीगदेसे पिन्खम्बा भन्दा ल्हानान हाडला सेमहेन्से ताड्सी ताड्सी पिन्बा मुबा भिबा ताम डाइ एनीगदेदा पाड्ला। ४थेनीगदेसे यरूशलेमरी मुबा परमेश्वरला म्हिगदेदा हो लबा मौका पिन्गो भिसी इन्देन छ्याम घरिघरि बिन्ती लजी। ५थेनीगदेसे इन्से म्हन्नोन आम्हन्बा ताम लजी। जम्मान भन्दा डाच्छा थेनीगदेसे हाड हाडदा प्रभुला छ्यारी जिम्मा पिन्जी, ओच्छे परमेश्वरसे म्हन्बा अन्छारला गे लबाला लागिरी एनीगदेसे हाडसे हाडदान इन्ना यारी जिम्मा पिन्जी।

६थे भेटी हुण्बा ज्यबा गे डाच्छा तीतससेन शुरु लजी। थेतबासेलमा एनीगदेला गुडरीनोन थे गे पूरा लबाला लागिरी एनीगदेदा हो लउ भिसी डन्से थेदान बिन्ती लजी। ७तर एनीगदे विश्वास लबारी, पाड्बारी, ज्ञान बुद्धिरी, जम्मान तामरी आँट पिन्बारीदेन डन्दा माया लबा चु जम्मान ताम एनीगदेसे ज्यना लसी लबान मुला। थेहड् लसीन पिन्बा गेएनोन एनीगदेसे ल्हानान लबान निउ।

८चु चा डाइ एनीगदेदा लनोन तोःला भिसी कुल्बा आहिन। तर स्थहान्दोगदेसे सेमहेन्सेन हो लबा तामग्याम एनीगदेसे स्थहान्दोगदेदा लबा माया सत्य हिन्ना कि आहिन भिसी था याड्बाला लागिरी डाइ चु ताम पाड्बा हिन्ना। ९य्हाडला प्रभु येशू खीष्टसे लबा दयामाया एनीगदेदा थानोन मुला। थे ल्हानान फ्युकपो मुबा। तसैनोन थे एनीगदेला लागिरी प्राडबो दोजी। तिग्दा भिसम हाड प्राडबो दोसी एनीगदे फ्युकपो दोखम्मौ भिसीन थेसे चुहड् लबा हिन्ना।

१० एनीगदेला लागिरी ज्यबा तगै भिबा डाला चु सल्लाह मुला। तिग्युडमा एनीगदेसे पिन्बा गे शुरु लबा जे आहिन, तर थे गे लबारीनोन ल्हानान सेम लबा मुबा। ११दाहेन्से एनीगदेसे थे गे पूरा लउ। शुरु लबा

धुइरी एनीगदेसे ल्हानान पिन्बा सेम लबा अन्छार खमतेधोना पिन्सी पूरा लउ। १२पिन्बा सेम मुसम म्हिसे हाडदेन छ्याम आरेबा स्हे आहिन, तर जुन स्हे हाडदेन छ्याम मुला थे अन्छार पिन्मा परमेश्वर ताड्ला।

१३ एनीगदेदा चा गाहो तगै, ओच्छे स्थहान्दोगदेदा चा सजिलो तगै भिसी डाइ चु ताम पाड्बा आहिन। तर जम्मान च्योच्यो ततोःला भिसी डाइ चु ताम पाड्बा हिन्ना। १४दान्दे एनीगदेदेन छ्याम ल्हानान मुबा स्हेग्याम आरेबागदेदा पिन्गो। ओच्छे लिच्छा थेनीगदेदेन छ्याम ल्हानान तबा धुइरी एनीगदेदा खाँचो तमा थेनीगदेसेनोन एनीगदेदा पिन्ना। थेहड् लजी भिसम जम्मान च्योच्यो तला। १५बचनरीनोन चुहड् लसी भिबा मुला, “ल्हानान दुइबा म्हिदाएनोन ल्हाना आतनी, ओच्छे च्याड्ना दुइबा म्हिदाएनोन आछ्योबा आतनी।”*

तीतसदेन थेला होगदे कोरिन्थरी निबा

१६तर परमेश्वरदा धन्यवाद तगै। तिग्दा भिसम थेसे एनीगदेला लागिरी तीतसदाएनोन डाला हड्बान सेम पिन्जी। १७तिग्दा भिसम थे डन्से पाड्बासे लमा जे एनीगदेदेन छ्याम हुप तबारी खबा आहिन, तर थे सेमहेन्सेन ताड्सी ताड्सी हाडनोन

एनीगदे मुबा ग्लारी खबान मुला।
 १८ओच्छे थार्बा पिन्बा समाचार
 थे:ना लसी भ्रमा जम्मान मण्डलीसे
 मान लबा आलेदाएनोन इन्से थेदेन
 छ्याम पुइखबान मुला। १९चुदे जे
 आहिन, मण्डलीसे हुप लबा भेटी
 यरूशलेमरी भोर्बा धुइरी चु आलेदा
 इन्देन छ्यामनोन निगै भिसी धम्बा
 मुला। चु ज्यबा गे इन्से प्रभुला
 मानदेन जयजयकार लबाला लागिरी
 ओच्छे आरेबागदेदा हो लबा सेम
 इन्दा मुला भिसी उन्बाला लागिरी
 लबा हिन्ना। २०ज्यबा सेमसे पिन्बा
 चु भेटी यरूशलेमरी भोर्सी थेला
 विश्वासीगदेदा भो लसी पिन्बा धुइरी
 इन्दा चु भेटीला बारेरी खालैसेन दोष
 थालगै भिसी इनी होशियार तसी गे
 लमुला। २१तिग्दा भिसम इन्दा प्रभुला
 डाच्छापट्टि जे आहिन, तर म्हिगदेला
 डाच्छापट्टिएनोन जुन ताम ज्यबा मुला
 थेनोन ताम लबा सेम मुला।

२२थेनीगदेदेन छ्यामनोन इन्से
 स्थहान्दो आले गिकदाएनोन एनीगदे
 मुबा ग्लारी पुइखबान मुला। इन्से
 ल्हानान रेम च्यामा थे प्रभुला गे
 लबारी ल्हानान भन्बा म्हाइजी।
 ओच्छे थेसे एनीगदेथोरी भर लबासे
 लमा थेसे भन ल्हानान गे लबारी
 आँट याइबा मुला। २३तीतस चा
 डादेन छ्यामनोन ढिक्सी गे लबा
 डाला हो हिन्ना। थेसे एनीगदेसे हो
 लबा गेरी डादा हो लमुला। ओच्छे
 थेदेन छ्याम खबा स्थहान्दो आलेगदे

चा मण्डलीगदेसे पुइखबा आलेगदे
 हिन्ना। थेनीगदेएनोन ख्रीष्टला
 मानदेन जयजयकार लबागदे हिन्ना।
 २४थेतबासेलमा चु म्हिगदेदा एनीगदेसे
 हाडला माया उन्गो। ओच्छे इनी
 एनीगदे म्हाइसी तिग्दा ताइबा मुला थे
 ताम थेनीगदेदा उन्गो। तिग्दा भिसम
 चु ताम जम्मान ग्लाला मण्डलीगदेसे
 था याइगै।

विश्वासीगदेसे हुप्बा भेटी

६ यरूशलेमरी मुबा परमेश्वरला
 म्हिगदेला लागिरी पिन्बारी
 छ्याइबा भेटीला बारेरी डाइ एनीगदेदा
 भ्रितो:बा ताम तिगै आरे। २तिग्दा
 भिसम एनीगदे सदन स्थहान्दोदा हो
 लबारी तयार मुला भिबा ताम डादा
 था मुला। एनीगदे अखैया अञ्चलरी
 मुबागदे तिग्युडमाहेन्सेन स्थहान्दोदा
 हो लबारी तयार तबासे लमा डा
 ताइबा ताम माकेडोनिया अञ्चलला
 म्हिगदेदा पाइबा मुबा। चु ताम
 थे:सी माकेडोनियाला ल्हानान म्हिसे
 स्थहान्दोदा हो लबा आँट याइजी।
 ३तर इनी एनीगदेला जुन गेला बारेरी
 थे:सी ताइबा मुला। थे ताइबा ताम
 खेरोरी थानिगै भिसी डाइ आलेगदेदा
 पाइबा अन्छार एनीगदे भेटी पिन्बारी
 तयार तसी चिउ। डाइ आलेगदेदा
 एनीगदे मुबा ग्लारी पुइखबान मुला।
 ४चुदे माकेडोनिया अञ्चलला खालै
 म्हि डादेन छ्याम खबा धुइरी एनीगदे
 तयार आरेबा स्याप्जी भिसम इनी

पे:तो:ला। ओच्छे एनीगदेएनोन
 ल्हानान पे:तो:ला। तिग्दा भिसम डन्से
 एनीगदेशीरी ल्हानान भर लबा मुला।
 ५थेतबासेलमा एनीगदेसे पिन्ना भिसी
 कबुल लबा भेटी डा खबा भन्दा
 डाच्छान ढिकना लबाला लागिरी
 डाइ आलेगदेदा एनीगदे मुबा ग्लारी
 पुइखवान ज्यबा तला भिसी म्हन्जी।
 ओच्छे चु भेटी खालैला करकापसे
 आहिन, तर हाडलान सेमग्याम पिन्बा
 भेटी तगै।

ल्हानान ढ्वबासे ल्हानान बाली दुइला

६तर च्याङ्ना ढ्वबा म्हिसे
 च्याङ्गनान बाली दुइला, ओच्छे ल्हाना
 ढ्वबा म्हिसे ल्हानान बाली दुइला
 भिबा ताम एनीगदेसे थाम्ले:गो।*
 ७ओच्छे जम्मान म्हिसे हाडला
 सेमसे म्हन्बा अन्छार पिन्गो। पिन्गे
 आम्हन्सम खालैला करकापरी तसी
 थापिन्गो। तिग्दा भिसम सेमहेन्सेन
 ताङ्सी पिन्बा म्हिदा परमेश्वरसे
 माया लमुला। ८परमेश्वरसे
 एनीगदेदा जम्मान स्हे तो:बा भन्दा
 ल्हानान पिन्ना। जमाहेन्से एनीगदेदेन
 छ्याम सदन ल्हानान स्हेगदे तला,
 ओच्छे एनीगदेसे ज्यबा गेला लागिरी
 स्थहान्दोगदेदा पिन्बारी खम्ला।
 ९बचनरीनोन चुहङ् भिसी भिबा
 मुला,

“थेसे सेमहेन्सेन ताङ्सी
 प्राडबोगदेदा पिन्ना।
 ओच्छे थेसे लबा ज्यबा गे
 जुकजुकधोनान चिला।”*

१०खेती लबा म्हिदा परमेश्वरसेन
 ढ्वबारी ब्लुदेन चबारी चबा स्हे
 पिन्ना, थेसेन एनीगदेदा ब्लु पिन्ना
 ओच्छे फुइना लसी ल्हेना लला।
 एनीगदेसे लबा थे ज्यबा गेरी
 परमेश्वरसे मोलम पिन्बासे लमा
 स्थहान्दोगदेदा हो लबारी खम्ला।*
 ११एनीगदेसे ज्यबा सेमसे पिन्स्वमौ
 भिसी परमेश्वरसे एनीगदेदा जम्मान
 स्हेरी मोलम पिन्ना। ओच्छे एनीगदेसे
 पिन्बा भेटी डन्से अर्गु मण्डलीगदेदा
 पिन्ना थेनीगदेसे परमेश्वरदा धन्यवाद
 पिन्ना। १२एनीगदेसे पिन्बा भेटीग्याम
 परमेश्वरला म्हिगदेला खाँचो जे
 टारेब तबा आहिन। तर एनीगदेसे
 पिन्बा भेटीसे लमा थेनीगदेसे
 परमेश्वरदा ल्हानान धन्यवाद
 पिन्ना। १३एनीगदेसे लबा थे ज्यबा
 गेग्याम एनीगदेसे हाड खाहङ्बा म्हि
 हिन्ना भिसी उन्बा मुला। एनीगदेसे
 खीष्टला थार्बा पिन्बा समाचारदा
 विश्वास लसी कुल्बा ताम ड्यान्बासे
 लमा, एनीगदेसे हाडदेन छ्याम मुबा
 स्हेगदे सेमहेन्सेन ताङ्सी थेनीगदेदेन
 स्थहान्दोदा पिन्बा ताम प्राड्बासे
 लमा म्हिगदेसे परमेश्वरला मानदेन
 जयजयकार लला। १४परमेश्वरसे

एनीगदेदा ल्हानान दयामाया लबासे लमा थेनीगदेसे एनीगदेदा ल्हानान माया लसी एनीगदेला लागिरी प्रार्थना लला। १५ पाङ्सी पाङ्बारी आखम्बा मोलमं पिन्बाला लागिरी परमेश्वरदा धन्यवाद तगै।

पावलसे हाडला गे जोगब लबा

१० एनीगदे न्हडला कोइ कोइसे डा एनीगदेदेन छ्याम चिमा चा सोजो तसी ताम लमुला, ओच्छे एनीगदेग्याम फेसी निमाहेन्से चा बड्मुला भिसी पाङ्मुला। दाहेन्से ख्रीष्टसे पिन्बा सेमदेन दयाग्याम एनीगदेदा डा पावलला बिन्ती मुला। २ जुन म्हिगदेसे उन्दा जम्बुलिडला आज्यबा बानीबेहोर थोबा म्हि हिन्ना भिसी म्हन्बा मुला, थे म्हिगदेदा डा एनीगदे मुबा ग्लारी खबा धुइरी डाइ बड्आतोःगै। ३ हिन्ना, दान्दे यहाड जम्बुलिडरी मुला, तसैनोन ख्रीष्टदा डोआसेबा म्हिगदेसे हड् लसी यहाडसे लडाइ आल। ४ उन्से लडाइरी थोबा हतियारगदे चा स्थान्दो म्हिगदेसे थोबा हतियार हड्बा आहिन। तर उन्से थोबा हतियार चा शैतानना शक्तिदेन उन्ना गुडरी मुबा लुसीला तामगदेदा नाश लखम्बा परमेश्वरला शक्ति हिन्ना। ५ घमण्ड लसी परमेश्वरला ज्ञान

बुद्धिला बिरोध लबा जम्मान तामगदेदा उन्से नाश लबा मुला। ओच्छे जम्मान म्हन्बा तामगदेदा ख्रीष्टसे कुल्बा ताम इयान्गै भिसी उन्से तहरी थान्बा मुला। ६ एनीगदे पूरान कुल्बा ताम अन्छार भ्रमाहेन्से कुल्बा ताम अन्छार आभ्रबागदे जम्मादान सजाय पिन्बारी डनी तयार मुला।

७ एनीगदेसे हाडसे म्राड्बा स्हेगदेदा जे च्यामुला। एनीगदे न्हडला खालैसे डा ख्रीष्टला म्हि हिन्ना भिसी पूरान विश्वास लबा मुला भिसम थेसे डनीएनोन ख्रीष्टला म्हि हिन्ना भिसी घोतोःला। ८ उन्से याड्बा अधिकारला बारेरी डाइ ल्हानान घमण्ड लसी पाङ्बा मुसैनोन डा पेःआतोः। तिग्दा भिसम चु अधिकार एनीगदेदा न्होङ्ना लबाला लागिरी आहिन, तर एनीगदेदा विश्वासरी कोङ्बा स्होबाला लागिरीन प्रभुसे पिन्बा हिन्ना। ९ डाइ एनीगदेदा भ्रिबा चिठीगदे एनीगदेदा लोङ्ना लबाला लागिरी भ्रिबा हिन्ना भिसी थाम्हन्गो। १० तिग्दा भिसम कोइ कोइसे “पावलसे चिठीगदे भ्रिबा धुइरी चा उन्दा बड्सी भ्रिमुला। तर यहाडदेन छ्याम हुप तबा धुइरी चा कमजोर तमुला, ओच्छे थेसे पाङ्मा तिगै गे आखेल्बा तमुला” भिसी पाङ्मुला। ११ थेहड्बा म्हिगदेसे उन्से चिठीरी जुन ताम भ्रिबा मुला, थेनोन अन्छार

६:१५ चु पदरी मोलम भिबा चा ल्हानान हड्बा बाइबल विद्वानगदेसे ख्रीष्ट हिन्ना भिसी पाङ्बा मुला।

एनीगदेदेन छ्याम हुप तमाएनोन लला भिबा ताम घेतो:ला।

१२कोइ कोइ म्हिसे ह्वाडसे ह्वाडदान घेन म्हि भिसी म्हन्मुला, थेहड्बा म्हिगदेदेन छ्याम डनी ह्वाडसे ह्वाडदान दाँजब लसी च्याबा सेम आरे। तर थेनीगदेसे ह्वाडसे ह्वाडदान घेन स्होसी ह्वाड ह्वाड न्हडरी दाँजब लसी च्याजी भिसम थेनीगदे तिगै आघोबा मूर्ख म्हि दोला। १३तर परमेश्वरसे पिन्बा अधिकारला बारेरी जे डन्से घेन दोसी ताम पाङ्ला। परमेश्वरसे पिन्बा गेला बारेरी भन्दा अर्गु खजिबै तामला बारेरी डन्से घेन दोसी ताम आल। थेहड् लसी घेन दोसी लबा गे एनीगदे मुबा ग्लारीनोन धोखबा मुला। १४एनीगदे मुबा ग्लारी खनोन आखबा म्हिसे हड् लसी डन्से मुबा आरेबा तामगदेरी ताङ्सी भ्रबा आरे। तिगदा भिसम जम्मान भन्दा डाच्छा ख्रीष्टला थार्बा पिन्बा समाचार भसी एनीगदे मुबा ग्लारी खबा म्हि डनीन हिन्ना। १५स्थहान्दोगदेसे लबा गेदा डन्से लबा हिन्ना भिसी ताङ्सी आभ्र, तर डनी ह्वाडसेन लबा गेरी जे ताङ्ला। एनीगदेला विश्वास ल्हेबान निमा एनीगदेला गुडरी डन्से लबा गे भन बढब तबान निला भिबा डन्दा आश मुला। १६चुहड् लसी डन्से लबा गे एनीगदेला गुडरी बढब तबान निजी भिसम डन्से एनीगदेग्याम अर्गु

यहुल्सारीनोन थार्बा पिन्बा समाचार थे:ना लबारी खम्ला। थेहड् तजी भिसम डन्से स्थहान्दोगदेसे डाच्छान गे लबा ग्लारी निबा सेम आल। तिगदा भिसम स्थहान्दोगदेसे लबा गेदा डन्से लबा हिन्ना भिसी ताङ्सी भ्रबा सेम आरे। १७तर बचनरीनोन चुहड् भिसी भ्रिबा मुला, “जुन म्हिदा ताङ्बा सेम मुला थे म्हि प्रभुला बारेरी ताङ्गै।”* १८तिगदा भिसम खालैसे डा ज्यबा म्हि हिन्ना भिदेमा थे ज्यबा म्हि आत। तर जुन म्हिदा प्रभुसे ज्यबा म्हि हिन्ना भिसी सुङ्ला, थेनोन ज्यबा म्हि तला।

पावलदेन लुसीला ताम पाङ्बा मुल
चेला

११ डाइ मूर्ख ताम लसैनोन एनीगदेसे नाला भिबा डाइ आश लबा मुला। एनीगदेसे डादा नासी पिन्गो या। २परमेश्वरसे एनीगदेदा लबा हड्बान वास्ता डाइएनोन लबा मुला। तिगदा भिसम आबासे भामेदा म्हाछारला यारी जिम्मा पिन्बारी कबुल लबा हड् लसी डाइ एनीगदेदाएनोन चोखो मिडकोलादा हड् लसी ख्रीष्टला छ्यारी जिम्मा पिन्बा सेम लसी कबुल लबा मुला। ३तर शैतानसे पुख्रीला रूप किन्सी हव्वादा फसब लबा हड् लसी खालैसे एनीगदेला ख्रीष्टदा तेन्बा चोखो सेम न्होङ्ना लला वा भिसी

डा लोडुबा मुला। * ४तिग्दा भिसम चुदे खालै म्हि खसी एनीगदेदा डन्से पाडुबा येशूला बारेरी भन्दा स्थहान्दो येशूला बारेरी पाडुजी भिसम एनीगदेसे सेम लसी ड्यान्बा चीम। ओच्छे एनीगदेदा डाच्छा पाडुबा परमेश्वरला आत्मादेन थाबा पिन्बा समाचारला बारेरी भन्दा स्थहान्दो आत्मादेन समाचारला बारेरी पाडुजी भिसम थे ताम एनीगदेसे तुरुन्तन विश्वास लबा चीम। ५थे जम्मान भन्दा घेन मुल चेला दोबा स्होबा म्हिगदे भन्दा डा तिगै तामरी जजा मुला भिसी म्हन्बा आरे। ६डा ज्यना लसी ताम पाडुबारी आसेबा म्हि तसैनोन डादेन छ्याम ज्ञान बुद्धि चा मुला। चु जम्मान ताम डन्से डाच्छान एनीगदेदा ज्यना लसी घोना लसी उन्बा मुला।

७एनीगदेदा घेन स्होबाला लागिरी डा जजा दोसी एनीगदेग्याम तिगै आकिन्ना परमेश्वरला समाचार थे:ना लमा तिग डाइ पाप लबा हिन्ना? ८डाइ एनीगदेदा हो लबाला लागिरी अर्गु मण्डलीगदेग्याम टाडगा किन्मा अर्गु मण्डलीगदेदा डाइ ठगब लबा हडुबान तजी। ९एनीगदेदेन छ्याम चिमा डादा खाँचो तबा धुइरी डाइ एनीगदेदा दुख आपिन्नी। डादा खाँचो तबा धुइरी जम्मान स्हेगदे

माकेडोनियाग्यामसेन आलेगदेसे भसी पिन्मुबा। दान्देनोन एनीगदेदा दुख पिन्बा सेम आरे। चु तामला लागिरी डाइ एनीगदेदा डाच्छाएनोन दुख आपिन्नी, दाहेन्सेनोन डाइ एनीगदेदा दुख आपिन। * १०अखैया अञ्चलरी डाइ ताडुसी पाडुबा चु तामदा थापाडुगो भिसी खालैसेन पाडुबारी आखम। तिग्दा भिसम डाला सेमरी ख्रीष्टला सत्य बचन मुला। ११डाइ तिग्दा चुहडु लबा हिन्ना? तिग डाइ एनीगदेदा माया आलबासे लमा हिन्ना? डाइ एनीगदेदा माया लमुला भिबा ताम परमेश्वरदान था मुला।

१२तर डन्से लबा हडुबान गे लबा मुला भिसी ताडुबारी म्हाइबा थे जम्मान भन्दा घेन मुल चेला दोबा स्होबा म्हिगदेदा ताडुसी भ्रबा मौका आपिन्बाला लागिरी डाइ दान्दे जुन गे लबान मुला थे गे सदन लला। १३तिग्दा भिसम थेहडुबा म्हिगदे ख्रीष्टला मुल चेला दोबा स्होसी स्थहान्दोदा छल लसी भ्रबा फट्टा चेलागदे हिन्ना। १४चु तिगै उदेक म्हन्तो:बा ताम आहिन। तिग्दा भिसम शैतानसेनोन म्हिदा फसब लबाला लागिरी य्हाल य्हाल्बा स्वर्गदूत हडुबान दोसी खमुला। १५थेतबासेलमा शैतानना नोकरगदेएनोन परमेश्वरदा

११:१२ “डन्से लबा हडुबान गे” भिबा चा पावलसे तिगै टाडगा आकिन्ना लबा गे हिन्ना (२ कोर ११:७-९ स्हीगो), तर घेन मुल चेला दोबा स्होबागदेसे चा टाडगा किन्सी गे लमुबा। ११:३ उत्प ३:१-२० ११:९ फिलि ४:१५-१८

सेम निबागदे हड्बान दोसी भ्रजी भिदेमा तिगै उदेक म्हन्तोःबा ताम आरे। परमेश्वरसे निसाफ लबा धुइरी थेनीगदेसे हाडसे लबा आज्यबा गेला सजाय नातोःला।

पावलसे नाबा दुखगदे

१६ डाइ दोःसीनोन पाङ्गला, डादा खालैसेन मूर्ख थाम्हन्गो। चुदे एनीगदेसे डादा मूर्ख म्हन्बा मुसम मूर्खन म्हन्सी डाइ पाङ्गमा विश्वास लउ। जमाहेन्से डाइएनोन तिगै तामरी जजाकर भिसै ताङ्ग्याङ्गला। १७ हिन्ना, ताङ्गबा तामला बारैरी डाइ मूर्खसे हड् लसीन ताम लबान मुला। चु ताम चा डादा प्रभुसे कुल्बासे लमा पाङ्गबा आहिन। १८ ल्हानान म्हिगदे जम्बुलिङ्गला तामगदेथोरी ताङ्गबासे लमा डाइएनोन ताङ्गला। १९ एनीगदे मी ल्हानान ज्ञान बुद्धि मुबा म्हि दोजीम। ओच्छे मूर्ख म्हिगदेसे पाङ्गमाएनोन ताङ्गसी ताङ्गसी नाबा चीम। २० चुदे खालै म्हिसे एनीगदेदा नोकर स्होसैनोन, ठगब लसैनोन, ब्यन्सैनोन, एनीगदेदा धाक उन्सैनोन ओच्छे ग्रम्बारीन तोसैनोन एनीगदेसे थे जम्मान नाबा चीम। २१ एनीगदेदा स्थहान्दोगदेसे लबा हड्बान डन्से लआखम्नी भिसी डा पेःतोःबा हिन्ना? आहिन।

तर खालै म्हि तिगै तामरी ताङ्गबा मुसम डाइएनोन थे तामरी ताङ्गला।

हिन्ना, डाइ मूर्ख म्हिसे हड् लसीन ताम लबान मुला। २२ तिग थेनीगदे हिब्रू हिन्ना? डाएनोन हिब्रू हिन्ना। तिग थेनीगदे इस्राएली हिन्ना? डाएनोन इस्राएली हिन्ना। तिग थेनीगदे अब्राहामला सन्तान हिन्ना? डाएनोन अब्राहामला सन्तान हिन्ना। २३ तिग थेनीगदे ख्रीष्टला गे लबा म्हिगदे हिन्ना? म्योबा म्हिसे हड् लसीन डाइ चु तामगदे पाङ्गबान मुला। थेनीगदे भन्दा मी डा भन ज्यना लसी ख्रीष्टला गे लबा म्हि हिन्ना। थेनीगदेसे भन्दा डाइ ल्हानान दुख लसी गे लजी। ओच्छे थेनीगदे भन्दा डा ल्हानान रेम भयाल्खानरी परब तजी। थेनीगदेदा भन्दा डादा कोर्गसेनोन ल्हानान तोजी। ओच्छे गाते रेम मी डा सिला हड्गोनोन तजी। * २४ डादा यहूदीगदेसे डारेमधोना चुङ्गसी तोजी। थेनीगदेसे डादा डारेम डारेमधोना बोगल गिकसे च्युक कुरेमधोना कोर्गसे तोजी। * २५ सोमरेमधोना डादा कडीसे तोजी। तिरेम युङ्गबासेनोन तोजी। सोमरेमधोना डा क्रेःबा पानी जहाजएनोन न्होङ्गजी। ओच्छे धिन गिक म्हुन गिक डा समुन्द्ररीन चिजी। *

२६ ख्रीष्टला समाचार थेःना लसी भ्रमा डा स्योडरी परब तसी, ओच्छे यह्योगदेग्याम, हाङ्गलान म्हि यहूदीगदेग्याम, अर्गु यह्युलला

म्हिगदेग्याम, शहररीनोन, तोडतोडबा
ग्लारीक्यार निमाएनोन, समुन्द्रग्याम
भ्रमाएनोन, लुसीला ताम पाङ्सी
भ्रबा आलेगदेग्याम दुख नातो:जी।*
२७ डा गाते रेम मी म्हेबारी आम्याङ्नी
तसैनोन आब्लेना दुख लसी गे लजी,
गाते रेम चबा थुङ्बा आयाङ्ना
फोइथाननोन चितो:जी ओच्छे क्वान
आरेबासे लमा खङ्बा नासीनोन
चितो:जी। २८ ओते जे आहिन,
मण्डलीगदेला बारेरीनोन डादा धिन
धिननोन सुर्दा तमुबा। २९ खालै म्हि
विश्वासरी कमजोर तबा म्राङ्जी
भिसम डाएनोन कमजोर तबा
हङ्गोन छोर्मुला, ओच्छे खालै म्हि
पापरी फसब तबा म्राङ्जी भिसम
डादा सेमरी ल्हानान दुख तमुला।

३० चुदे डा ताङ्गोन तो:जी भिसम
डाला कमजोर तामगदे उन्मा ताङ्गला।
३१ डाइ पाङ्बा तामगदे लुसीला
ताम आहिन भिबा प्रभु येशूला आबा
य्हाङला परमेश्वरदान था मुला।
थेदा य्हाङसे सदन जयजयकार
लतो:ला। ३२ दमस्कस भिबा शहररी
मुबा धुइरी अरितस भिबा ग्लेला
हाकिमसे डादा चुङ्बाला लागिरी ग्ला
ग्लारी सिपाहीगदे थान्मुबा।* ३३ तर
डादा सदुनरी भाङ्सी पर्खालला
भयालग्याम मार पुइबासे लमा डा थे
ग्लेला यारी परब आतनी।

पावलसे म्राङ्बा म्हाड

१२ तिगै फाइदा आरेसैनोन
डा ताङ्गला। ओच्छे डादा
प्रभुसे उन्बा तामदेन डाइ म्राङ्बा
म्हाङला बारेरी एनीगदेदा पाङ्गला।
२ च्युक बिल दिङ डाच्छाला ताम
हिन्ना, ख्रीष्टदा विश्वास लबा म्हि
गिकदा स्वर्गला जम्मान भन्दा घेन
ग्लाधोनान भोर्जी। थे म्हिदा^१ डाइ
डोसेबा मुला, तर थेदा ल्हुइरी साँच्चिन
भोर्बा हिन्ना कि आहिन थे ताम डादा
था आरे, परमेश्वरदान था मुला।
३ डाइ दो:सी पाङ्गला, स्वर्गधोनान
भोर्बा थे म्हिदा डाइ डोसेबा मुला।
तर ल्हुइरीन भोर्बा हिन्ना कि आहिन,
थे ताम डादा था आरे, परमेश्वरदान
था मुला। ४ थेदा स्वर्गरी थीसी भोर्जी,
थेरी थेसे म्हिसे पाङ्आखम्बा घेन
घेन ताम थे:जी, थेहङ्बा ताम म्हिदा
पाङ्आपुङ्मुला। ५ थेहङ्बा म्हिला
बारेरी डा ताङ्गला, डा हाङलान बारेरी
चा आताङ्। तर डा चा डाला कमजोर
ताम उन्बा धुइरी जे ताङ्गला। ६ डाइ
ताङ्गीन भ्रबा सेम लसैनोन डा मूर्ख
म्हि चा आदो। तिगदा भिसम डाइ
सत्य ताम पाङ्बा मुला। डाइ लबा
गे म्राङ्बादेन डाला बारेरी थे:बा
भन्दा ल्हाना घेन म्हि भिसी खालैसेन
थाम्हन्गै भिबा डाला सेम मुला।

१२:२ चुरी चा पावलसे “थे म्हि” भिसी हाङसे हाङदान पाङ्बा हिन्ना।

११:२६ मुल ६:२३; १४:१५ ११:३२-३३ मुल ६:२३-२५

७ डाइ प्रभुसे उन्बा म्हाड प्राड्जी भिसी घेन दोसी थाभ्रगै भिसी डाला ल्हुइरी पुजुसे भ्लोबा हड्बान स्हेर पिन्जी। थेसे शैतानना दूतसे हड् लसी डादा धुइ धुइरी ताड्सी थाभ्रगै भिसी दुख पिन्मुला। ८ “डादा चु दुखग्याम फेसी पिन्गो” भिसी डाइ प्रभुदा सोमेरमधोना बिन्ती लजी। ९ तर प्रभुसे डादा “डाइ एदा ल्हानान दयामाया लबा मुला, ए कमजोर मुबा धुइरी डाला शक्ति एग्याम उन्बा मुला” भिसी सुड्जी। थेतबासेलमा डा कमजोर मुबा धुइरी डा भन ल्हानान ताड्बा मुला। तिग्दा भिसम थे धुइरी परमेश्वरसे ख्रीष्टला शक्ति डाग्याम उन्बा मुला। १० थेतबासेलमा ख्रीष्टला लागिरी कमजोर तसैनोन, डादा बेइज्जत लसैनोन, बिरोध लसैनोन, स्थहान्दोसे दुख पिन्सैनोन, ओच्छे आपत विपत तसैनोन डा ताड्ला। तिग्दा भिसम कमजोर तबा धुइरी डा भन भड्बा तला।

कोरिन्थला म्हिगदेला लागिरी पावलसे सुर्दा लबा

११ डा मूर्ख हड्बा दोबा मुला, डादा मूर्ख हड्बान स्होबा चा एनीगदेन हिन्ना। एनीगदेसे डाला बारेरी ज्यबा ताम लतोःमुबा। पाड्नोन तोःमा डा तिगैनोन आहिन, तर थे जम्मान भन्दा घेन मुल चेला दोबा स्होबा म्हिगदे भन्दा डा जजा आहिन। १२ डाइ एनीगदेला गुडरी जम्मान दुख नाबान

शक्तिशाली चिनुगदेदेन उदेकला गेगदे लसी डा पक्कान मुल चेला हिन्ना भिसी एनीगदेदा उन्बा मुला। १३ खजिबा तामला बारेरी एनीगदे अर्गु मण्डलीगदे भन्दा जजा तजी? चु ताम जे हिन्ना, डाइ अर्गु मण्डलीगदेरी लबा गे गिक चा एनीगदेला लागिरी आलनी। थे गे चा तिग हिन्ना भिसम डाइ एनीगदेग्याम टाड्गा आकिन्नी। चु डाला गल्ती हिन्ना, चुला लागिरी डादा माफ लउ।

१४ डा दोःसीनोन एनीगदे मुबा ग्लारी खबारी छ्याइबा मुला। दान्दे खमा डा एनीगदे मुबा ग्लारी खबा सोमेरम तला। तर एनीगदेसे डाला लागिरी तिगै खर्च लआतोः। डाइ एनीगदेला सम्पत्ति म्हाइबा आहिन, डाइ मी एनीगदेदा चा म्हाइबा हिन्ना। तिग्दा भिसम आबा आमासे कोलागदेग्याम आकिन, तर आबा आमासे चा कोलागदेला लागिरी सोसी थान्ना। १५ डादेन छ्याम मुबा जम्मान स्हेगदे डाइ एनीगदेदा ताड्सी ताड्सी पिन्ना। ओच्छे एनीगदेला लागिरी डा सिबारीनोन तयार मुला। डाइ एनीगदेदा सेमहेन्सेन ल्हानान माया लबा मुला भिसम तिग्दा एनीगदेसे चा डादा जजाकर जे माया लबा? १६ एनीगदेसे डाला लागिरी तिगै खर्च लआतोःनी, चु ताम एनीगदेदान था मुला। तर डा बाठो तसी डाइ एनीगदेदा फसब लजी भिसी खालैसे पाड्मुला। १७ तिग डाइ पुइखबा

म्हिगदेग्याम एनीगदेदा फसब लसी डाइ तिगै स्हे किन्बा मुला? ^{१८}डाइ तीतसदा एनीगदे मुबा ग्लारी निउ भिसी पुइखजी, ओच्छे थेदेन छ्याम डाइ स्थान्दो आलेदाएनोन पुइखबा मुबा। तीतससेनोन एनीगदेग्याम तिगै स्हे आकिन्नी। थेदेन डा सेम गिक तसी गे गिकनोन लबा मुला।

^{१९}चु जम्मान ताम डन्से हाडदान जोगब लबाला लागिरी पाड्बा हिन्ना भिसी एनीगदेसे म्हन्मुला तला। चु जम्मान ताम परमेश्वरला डाच्छा ख्रीष्टदेन छ्याम गिक तसी डन्से पाड्बान मुला। डन्ना सेम निबा होगदे, डन्से चु जम्मान गे लबा चा एनीगदेदा विश्वासरी कोड्बा स्होबाला लागिरीन हिन्ना। ^{२०}तिगदा भिसम डा थेरी खबा धुइरी डाइ म्हन्बा अन्छार एनीगदेदा आस्याप, ओच्छे एनीगदेसेनोन हाडसे म्हन्बा अन्छार डादा आस्याप वा भिसी डा लोड्बा मुला। एनीगदे हाड हाड न्हडरी छेबा बड्बा लबा, डाह लबा, बोमो लबा, हाडला जे फाइदा च्याबा, स्थान्दोदा बड्बा, म्हेला तामगन लबा, हाडसे हाडदान डा हड्बा खालै आरे भिसी म्हन्बागदे ओच्छे अलमल तना लबा म्हिगदे स्याप्ला वा भिसी डा लोड्बा मुला। ^{२१}डा एनीगदे मुबा ग्लारी दोःसी खमा डादा डाला परमेश्वरसे एनीगदेला डाच्छा जजा स्होला भिसी

डा लोड्बा मुला। ओच्छे डाइ ल्हानान म्हिगदेला लागिरी सुर्दा लतोःला। तिगदा भिसम डाच्छा नइबा गे लबादेन स्थान्दोदेन छ्याम ब्रेल्सी भ्रबा ओच्छे सेमरी जे लइ म्हन्बा थेनोन लसी पाप लबा म्हिगदेसे हाडला पाप रूलासी परमेश्वरपट्टि दोःबा आरे तला।

पावलसे अभ्र होशियार तना लबा

१३ डा दोःसीनोन एनीगदे मुबा ग्लारी खला, दान्दे खमा सोमरेम तला। बचनरी चुहड् भिसी भ्रिबा ताम ढन्गो, “खालै म्हेदा सजाय पिन्बाला लागिरी थेसे लबा गे म्राड्बा म्हे न्ही सोमसे पाड्बाग्यामसेन सजाय पिन्तोःबा कि पिन्आतोःबा भिसी था याड्ला।”^{*} ^२न्हीरेमला पालरी डा एनीगदेदेन छ्याम मुबा धुइरी डाइ एनीगदेदा होशियार तना लबा मुबा। दान्दे डा एनीगदेदेन छ्याम आरेबा धुइरीनोन डाइ एनीगदेदा होशियार तना लबान मुला। डा दोःसी एनीगदे मुबा ग्लारी खमा डाच्छा डाच्छा पाप लबागदेदेन स्थान्दोगदे खालैदान डाइ आरूला। ^३थे धुइरी ख्रीष्ट डादेन छ्याम गिक तसी डाग्याम ताम पाड्बा चीम कि आपाड्बा चीम भिसी एनीगदेसे च्याबारी म्हाइबा ताम था याड्ला। एनीगदेला गुडरी गे लमा ख्रीष्ट खाइमै कमजोर आत, तर शक्तिशाली तला। ^४तिगदा भिसम

ख्रीष्ट कमजोर तसी कुसरी सिजी। तर परमेश्वरला शक्तिसे थेदा सोना लजी। थेहड् लसीन डनीएनोन ख्रीष्ट हड्नुनोन कमजोर तबा मुला। तर एनीगदेला गुडरी गे लबाला लागिरी परमेश्वरसेन हाडला शक्तिग्याम डन्दा ख्रीष्टदेन छ्याम सोना लला।

५ एनीगदेसे पक्का विश्वास लबा मुला कि आरे भिसी हाडसे हाडदान च्यागो। चुहड् लसी च्यामा येशू ख्रीष्ट एनीगदेदेन छ्याम आस्याप्नी भिसम एनीगदेसे पक्का विश्वास लबा आरेबा चीम भिसी था याड्ला।

६ ओच्छे डन्से पक्का विश्वास लबा मुला भिबा तामएनोन एनीगदेसे था याड्ला भिसी डाइ आश लबा मुला।

७ एनीगदेसे आज्यबा गे थालगै भिसी डन्से परमेश्वरदेन छ्याम प्रार्थना लबान मुला। डनी चा ज्यबा म्हि हिन्ना भिसी उन्बाला लागिरी डन्से चुहड् लसी प्रार्थना लबा आहिन। तर एनीगदेसे डनी पक्का मुल चेला आहिन भिसी म्हन्सैनोन एनीगदेसे चा ठीक ठीक गे जे लखमगै भिसी डन्से प्रार्थना लबा हिन्ना। ८ तिगदा भिसम डनी सत्य तामला बिरोध लसी गे आल, तर सत्य तामला लागिरी जे गे लला। ९ डनी कमजोर तसैनोन एनीगदे चा भड्बा तजी

भिसम डनी ताड्ला। ओच्छे एनीगदे भन विश्वासरी पूरान पाको म्हि दोगै भिसी डन्से प्रार्थना लबा मुला। १० डा एनीगदे मुबा ग्लारी खमा प्रभुसे डादा पिन्बा अधिकारग्याम डाइ एनीगदेदा बड्आतोःगै भिसीन डा एनीगदेदेन छ्याम आरेबा धुडरी चु चिठी भिबान मुला। एनीगदेदा न्होड्ना लबाला लागिरी आहिन, तर एनीगदेदा विश्वासरी कोड्बा स्होबाला लागिरीन थे अधिकार प्रभुसे डादा पिन्बा हिन्ना।

चिठीला थुमरी पाड्बा ताम

११ ज्योज्यो आले नाना आडागदे, दाहेन्से डादा विदा पिन्गो। एनीगदे सेमहेन्सेन ज्यबा म्हि दोबारी म्हाइगो, ओच्छे गिकसेम गिकदा आँट पिन्सी हाड हाड न्हडरी ठिक्सी चिउ भिबा डाला बिन्ती मुला। जमाहेन्से शान्तिदेन माया पिन्बा परमेश्वर एनीगदेदेन छ्याम धन्छ्याला। १२ ओच्छे गिकसेम गिकदा सेमहेन्सेन माया लसी फ्याफुल्गो। १३-१४ परमेश्वरला चुरी मुबा जम्मान म्हिगदेसे एनीगदेदा फ्याफुल्बा मुला। प्रभु येशू ख्रीष्टला दयामायादेन परमेश्वरला माया ओच्छे परमेश्वरला आत्माला संगती एनीगदे जम्मानदेन छ्याम तगै।